



**भारत दा संविधान (इक सौ छेमां संशोधन), अधिनियम, 2023
(The Constitution (One Hundred and Sixth Amendment) Act, 2023)**

भारत दा राजपत्तर

असधारण

भाग-II - खंड I

प्राधिकार थमां प्रकाशत

संख्या 36

नर्मी दिल्ली, 28 सितंबर, 2023, बीरवार/ अस्सू 6, 1945 (शक)

कनून ते न्यांs मंत्रालय

(कनून विभाग)

नर्मी दिल्ली, 28 सितंबर, 2023/अस्सू 6, 1945 (शक)

संसद दे हेठ दिते गेदे अधिनियम 28 सितंबर, 2023 गी राष्ट्रपति दी मंजूरी मिली चुकी दी ऐ ते आम जानकारी आस्तै इस गी प्रकाशत कीता जंदा ऐ:-

भारत दा संविधान (इक सौ छेमां संशोधन) अधिनियम, 2023 (28 सितंबर, 2023)

भारत दे संविधान च संशोधन आस्तै अधिनियम भारत गणराज्य दे चोहतरमें बरे च संसद पासेआ हेठ दिते गेदे रूपै च एह अधिनियमत कीता जंदा ऐ:-

1. संखिप्त शीर्शक ते रंभ

(1) इस अधिनियम दा नांs भारत दा संविधान (इक सौ छेमां संशोधन) अधिनियम, 2023 होग।

(2.) एह अधिनियम उस तरीक थमां लागू होग, जिसलै केंदरी सरकार राजपत्र च अधिसूचना राहें जारी करग।

2. अनुच्छेद 239-कक च संशोधन

“संविधान दे अनुच्छेद 239-कक दे खंड (2) च, उपखंड (ख) दे बाद हेठ दिते गेदे उपखंड जोड़े जाडन, जि'यां-

(खक) राश्ट्री राजधानी खेतर दिल्ली दी विधान सभा च महिलाएं आस्तै थाहर आरक्षत कीते जाडन।

(खख) जित्थूं तगर मुमकन होग, राश्ट्री राजधानी खेतर दिल्ली दी विधान सभा च अनुसूचत जातियें आस्तै आरक्षत थाहरें चा इक बटा त्रै थाहर महिलाएं आस्तै आरक्षत होडन।

(खग) जित्थूं तगर मुमकन होग, राश्ट्री राजधानी खेतर दिल्ली दी विधान सभा च परतक्ख चुनाs राहें भरे जाने आहले कुल थाहरें चा इक बटा त्रै थाहर (जि'दे च अनुसूचत जातियें दी महिलाएं आस्तै आरक्षत थाहरें दी संख्या बी शामिल ऐ) महिलाएं आस्तै आरक्षत होडन ते एह आरक्षण संसद राहें कनून पासेआ निरधारत तरीके कन्नै कीता जाहग।”

3. नमैं अनुच्छेद 330-क दा जोड़ेआ जाना।

संविधान दे अनुच्छेद 330 दे बाद हेठ दित्ता गेदा अनुच्छेद जोड़ेआ जाहग, जि'यां-
लोक सभा च महिलाएं आस्तै थाहरें दा आरक्षण:-

“330-क (1) लोक सभा च महिलाएं आस्तै थाहर आरक्षत कीते जाडन।

(2) जित्थूं तगर मुमकन होग अनुच्छेद 330 दे खंड (2) दे तैहत अनुसूचत जातियें जां अनुसूचत जनजातियें आस्तै आरक्षत कुल थाहरें चा इक बटा त्रै

थाहर अनुसूचत जातियें ते अनुसूचत जनजातियें दी महिलाएं आस्तै आरक्षत होडन।

- (3) जित्थूं तगर मुमकन होग, लोक सभा दे परतक्ख चुनाऽ राहें भरे जाने आहले कुल थाहरें चा इक बटा त्रै थाहर (जेहदे च अनुसूचत जातियें ते अनुसूचत जनजातियें दी महिलाएं आस्तै आरक्षत थाहरें दी संख्या बी शामिल ऐ) महिलाएं आस्तै आरक्षत होडन।”

4. नमैं अनुच्छेद 332-क दा जोड़ेआ जाना

संविधान दे अनुच्छेद 332 दे बाद हेठ दिता गेदा अनुच्छेद जोड़ेआ जाहग, जि'यां-राज्यें दी विधान सभाएं च महिलाएं आस्तै थाहरें दा आरक्षण।

“332-क (1) हर-इक राज्य दी विधान सभा च महिलाएं आस्तै थाहर आरक्षत कीते जाडन।

- (2) जित्थूं तगर मुमकन होग, अनुच्छेद 332 दे खंड (3) दे तैहत अनुसूचत जातियें जां अनुसूचत जनजातियें आस्तै आरक्षण कुल थाहरें चा इक बटा त्रै थाहर अनुसूचत जातियें जां अनुसूचत जनजातियें दियें महिलाएं आस्तै आरक्षत होडन।

- (3) जित्थूं तगर मुमकन होग, हर-इक राज्य दी विधान सभा च परतक्ख चुनाऽ राहें भरे जाने आहले कुल थाहरें चा इक बटा त्रै थाहर (जेहदे च अनुसूचत जातियें ते अनुसूचत जनजातियें दी महिलाएं आस्तै आरक्षत थाहरें दी संख्या बी शामिल ऐ) महिलाएं आस्तै आरक्षत होडन।”

5. नमैं अनुच्छेद 334-क दा जोड़ेआ जाना

संविधान दे अनुच्छेद 334 दे बाद हेठ दिता गेदा अनुच्छेद जोड़ेआ जाहग, जि'यां-महिलाएं आस्तै थाहरें दे आरक्षण दी शुरुआत:-

“334-क (1) इस भाग जां 8में भाग दे पैहले आहले प्रावधानें च कुसै गल्लै दे होंदे होई बी, लोक सभा, कुसा राज्य दी विधान सभा ते राश्ट्री राजधानी खेतर दिल्ली दे विधान सभा खेतर च महिलाएं आस्तै थाहरें दे आरक्षण सरबन्धी संविधान दे प्रावधानें, इस मकसद आस्तै कीती जाने आहली हद्दबंदी दी कारवाई दे बाद असर दसडन, जेहड़े भारत दे संविधान (इक सौ छेमें संशोधन) अधिनियम, 2023 दे शुरुआत दे बाद पैहली मरदमशुमारी आस्तै प्रासंगक आंकड़ें दे प्रकाशत होने दे बाद कीती जाहग ते नेही शुरुआत थमां पंदरें बरें दी अवधि तगर लागू रौहडन।

(2) अनुच्छेद 239-कक, 330-क ते 332-क दे उपबंधें दे तैहत, लोक सभा, कुसै राज्य दी विधान सभा ते राश्ट्री राजधानी खेतर दिल्ली दी विधान सभा च महिलाएं आस्तै आरक्षत थाहर उस तरीक धोड़ी बने दे रौहडन, जिसी संसद कनून पासेआ निरधारत करग।

(3) लोक सभा कुसै राज्य दी विधान सभा ते राश्ट्री राजधानी खेतर दिल्ली दी विधान सभा च महिलाएं आस्तै आरक्षत सीटें दा आवृति, संसद पासेआ कनून राहें निरधारत हर पछेतरि हद्दबंदी दे बाद लागू होग।

(4) इस अनुच्छेद दी कोई गल्ल, लोक सभा, कुसा राज्य दी विधान सभा जां राश्ट्री राजधानी खेतर दिल्ली दी विधान सभा च कुसै प्रतिनिधी पर अदूं धोड़ी प्रभाs नेई पाग जदूं धोड़ी पूर्व मजूद लोकसभा, कुसा राज्य दी विधान सभा जां राश्ट्री राजधानी दिल्ली दी विधान सभा भंग नेई होई जा।”

6. मजूदा संशोधन दा असर लोक सभा, कुसै राज्य दी विधान सभा जां राश्ट्री राजधानी खेतर दिल्ली दी विधान सभा च आरक्षण पर नेई पौग-

भारत दे संविधान (इक सौ छेमां संशोधन) अधिनियम, 2023 राहें कीते गेदे संशोधन कन्नै लोक सभा, कुसा राज्य दी विधान सभा जां राश्ट्री राजधानी

खेतर दिल्ली दी विधान सभा च कुसै बी नेतृत्व गी अदूं धोड़ी प्रभावत नेई कीता जाहग, जदूं धोड़ी जे इस अधिनियम दे शुरुआती समें च मजूद लोक सभा, कुसा राज्य दी विधान सभा जां राश्ट्री राजधानी खेतर दिल्ली दी विधान सभा (जनेही बी स्थिति होग) भंग नेई होई जंदी।

डॉ. रीता वशिष्ठ, सचिव

भारत सरकार

